

四庫全書

集部

欽定四庫全書

集部

重編瓊臺藁卷二

詳校官監察御史臣范秉

中書臣劉源溥覆勘

總校官檢討臣何思鈞

校對官編修臣于鼎

謄錄監生臣汪致基

欽定四庫全書

集部六

重編瓊臺會藁

別集類五
明

提要

臣等謹案重編瓊臺會藁二十四卷明邱濬撰濬有家禮儀節已著錄其文集世不一本初其門人蔣冕等刻其詩曰吟稿續又裒其記序表奏曰類稿嘉靖中鄭廷鵠合二稿所載益以所得寫本釐為十二卷名曰會稿天

啟初其裔孫爾毅遴類稿十之二增會稿十之三併吟稿合刻曰重編會稿即此本也雖不及類稿會稿之完備而簡汰頗嚴菁華具在足以括濬之著作矣濬相業無可稱其立朝與葉盛不相能具載明史盛傳中又與莊昶相惡具載明史昶傳中其族御醫劉文泰誣陷王恕一事雖其妻亦知其非具載明史恕傳中講學家以其力崇朱子曲相回護迄

不能與公論爭也其兩廣平賊之策言之鑿
鑿然韓雍力駁其說竟奏蕩平具載明史雍
傳中則其好論天下事亦不過恃其博辯非
有實濟然記誦淹洽冠絕一時故其文章爾
雅終勝遊談無根者流在有明一代亦不得
不置諸作者之列焉乾隆四十六年十月恭
校上

總纂官臣紀昀臣陸錫熊臣孫士毅

總校官臣陸費墀

欽定四庫全書

重編瓊臺彙卷一

明 邱濬 撰

五言古詩

古意

三首

千金買寶刀 百金買角觿 寶刀頭有環 角觿能解絲 慙寄遠人用 以慰所思思 不見察幽獨 甘自怡

其二

客從天上來贈我雲錦章五色光奪目上有雙鸞翔秘
之不自用篋笥謹將藏幸然遇良工為我裁衣裳結以
紫霞綬佩以鳴玉璫服之朝九重文采何赫煌盛服今
所尚令德古所臧珍重鷓鴣詩三復不敢忘

其三

逝川無回流落日不再午人生百歲間役役徒自苦朝
為樹上花暮作花下土去住無常勢奄忽成今古反袂
問蒼天天乎奈何許

感興二首

人生會有老老至不自知壯心恒未已外貌忽已移青
青巾中髮俄然成素絲灼灼鏡中顏忽覺如枯梨盛年
不可恃行樂須及時有酒且痛飲不醉將奚為

其二

天際多剛風滄溟隔弱水相思不可極之子在萬里萬
里各一天恍惚在我前區區倘見察敢不輸中悃

過友人園居

愛此林泉勝載酒時來過芳樹發春華方池激清波嘉
魚爭出躍好鳥鳴相和天氣既已暄景物亦已多主人
雅好客相對酣且歌歌竟各嘆息人生能幾何

月下懷

明月空中懸碧雲天際合美人渺何許望望轉蕭索翩
翩驚鵲定片片簷花落惻然對孤影下帷閉齋閣

夜坐和曲江感遇詩韻 四首

空齋坐幽獨夜氣澹以清冥心古聖賢悠哉怡我情天

機一何深神理亦已精云胡契其妙勉旃惟思誠

其二

鳳凰翔千仞枳棘安足顧一朝覽德輝棲止梧桐樹飛
鳴恒自出羅網豈能懼三靈為我儔百鳥莫予惡笑彼
冥飛鴻猶為弋人慕

其三

南極有名相風度邈難得鳴臬羣刺天孤鳳戢其翼韶
石佳山水因之增秀色班班青史間流譽靡終極壯誦

感遇時臨風三嘆息

其四

深源無淺流高樹無卑枝
人生天地間奮發須有為
不見東注波逝者恒如斯
心中苟自盡意外非所知
嗟爾亡羊者紛紛多路岐

擬古四首

江南秋風至草木變焜黃
淅淅吹妾衣使妾增悲涼
悲涼知為誰良人在沙場
暮聽胡馬嘶朝看胡鴈翔
飢餐

風中糜渴飲雪下漿羊角衝地起沙礫爭飛揚回首望
故鄉長天但茫茫豈無肥與甘亦有衣與裳妾心空惻
惻路遠莫寄將北望長太息涕淚如雨霧幾欲徃從之
河廣無舟梁仰天籲上帝矢心期不忘但願南風競吹
君來妾旁

其二

客集高堂上衆味羅珍羞觥籌互交錯樂矣忘其憂清
醕飲桑落妙聲發吳謳寶鳧噴清烟芬芳襲輕裘肥醲

正厭飫文錦何溫柔獨念良人苦遠戍陰山頭黃茅連
白沙風雪寒颼颼凍雀飛不起依樹鳴啁啾馬毛縮如
蝟髀肉臙生周羔裘煖如烘漣酪清如油君身千萬艱
妾心千萬愁夢寐或見之道路阻且脩願言早成功諸
將各封侯良人章章來紅日照九州

其三

依依重依依不忍生別離別離已可悲况值秋風時柳
衰不堪折情苦不堪說願妾為小星君身化明月明月

貼天飛小星恒相隨
月出星隨出月歸星亦歸
莫學秋胡妻相逢不相識
生者固可慚死者亦何益

其四

白日日已晚行人日已遠
秋風又重來行人猶未返
颼颼朔風寒行人衣應單
世無杞梁妻千載徒悲酸

秋興二首

秋來百蟲號各自悲其生
物情尚有感况乃骨肉情
幽堂背花歲晚雪色零
忘憂更不忘日夕憂思增
嗟爾

客遊子胡為常遠行

其二

孟秋再初霽虛館生晚涼悲風振木末激烈流清商寒
蟬抱葉悲哀鴻叫雲翔蚯蚓出其竅蚺蟻鳴在房蟹蚤
鳴我前蟋蟀鳴我旁物各感其時豈必皆不平而我於
此際兀然坐欲殭淒然動我心冥思搜枯陽壯哉秋聲
賦三嘆思歐陽蘭臺一何卑戚戚徒爾傷

悼亡十首

擇配得孟光足慰平生心一見如夙昔友之如瑟琴意
氣兩不疑苦口時相箴欣願自此畢思愛何其深

其二

恩愛雖可慕嘉會不可遲同牢未周星而我顧有違辛
勤理行裝送我登王畿握手一長嘆淚下如雨滋收淚
向我拜再三頻致辭勉我立名節勿作無益悲

其三

我行逾四載之子苦幽閒登堂侍老母燈下事蠶績知

金史卷一百一十五
卷一
我為功名不復懷戚戚一見平安書喜氣動顏色

其四

嗟我登文場跼躅再不遂學陋慚為師懇辭得如志萬
里忽歸來相對如夢寐移燈頻近牀悲喜兩交至疊疊
用甘言慰我不得意

其五

久別復良晤欣幸如再生有如練絲絃絃和多妙聲自
茲擬百年資以輔所行明年還隨計挈之趨神京云何

未及期一疾不復興

其六

臨終嚙我指與作終天訣雙淚注不流戀戀不忍別氣
促發言遲奄奄殆垂絕勉我赴功名努我立名節事我
不盡年命薄將奚說死生皆其天無用過哀切

其七

朝日忽已沈晨花忽已零居然失良助我也何以生臨
終永不言此意良不輕矢心銘肺腑詎肯寒茲盟

其八

結髮六星霜歡會恰歲半平生止一息而我不及見歸
來空聞名目中無其面天乎人何尤撫膺坐長嘆

其九

嗟汝止一弟情義深以長汝歿僅閱月汝弟亦繼亡一
雙恩愛刃併割汝父腸每聞號哭聲使我增悲傷平生
心愛人相繼俄分張如失左右手內外俱皇皇地下倘
相逢應念予悽涼

其十

皇天亦何高后土亦何深冥鴻失其偶飛飛吐哀音茫
茫宇宙間遼邈疇能尋此生甘且休不盡古今心哀傷
諒無益暫醉聊自吟

述懷

時初入翰林

玉堂在天上瀛洲聚羣僊凡骨昔未蛻無路難夤緣我
生幸逢辰濫等廁英賢出入清華地昕夕相周旋經史
事幽討兀兀窮歲年誓言追往哲絕彼塵累牽立足千

伊岡游心萬古天長揖謝諸子齷齪誰與憐

小景

川光涵遠空山色淡平野危樓夕靄間高樹涼雲下久
客厭塵紛羨殺舟游者

母親太孺人壽旦

春三月二日我母初度辰一官繫詞林稱壽嗟無因緬
懷劬瘁恩莫能報涓塵稽首望南拜淚落沾衣巾想當
高堂上羅拜方紛紛膝下跪舉觴二子少一人慈顏於

此時應念未歸身
母子天一方
相思各愴神
恨我無羽翼
回首空長嘯
人生天地間
咸欲顯其親
顯親須宦游
況我家海濱
年年當此日
馳心隨白雲
自憐草木姿
無以會陽春
仰天祝母壽
盡忠希帝仁
萬一推恩典
此志庶少伸

分韻得勿字送李應禎因和北征詩與之

予友李應禎筮仕未叶吉如金方在鎔如女猶處室少
小思用世頃刻惟惜日奮志向霄漢棲迹尚圭筆至寶

恒自珍深藏不輕出高騫終遠到暫蹶未為失著存心
五思克念躬四勿矻矻良獨苦搢搢亦何切潛心入混
茫沈思超恍惚物理無窮盡志願罔終畢九轉紫府丹
三嘆清廟瑟妙削鼻汗聖快刃縷濡血揮霍迅雷變倏
忽浮漚滅葩華絢詞林根柢蟠理窟疊出山峩峩一瀉
水瀟瀟冥按鬼為愁悲壯石可裂堅壁什旗鼓開門合
車轍誓將古道敦不必時世悅藥籠富芝苓家園乏芋
栗空懸萬軸籤寧有千樹漆削雕返淳樸歛華就真實

禹鼎窮物怪商敦太古拙茫昧鳥跡餘浩蕩鷗波沒片
言無欠剩一覽備始末游鷗未擊水顧兔久藏穴舉世
少具眼誰人識竒骨焚舟取勝師即是前日卒際遇會
有時造化本無物無人摺我脇亦不摧彼髮惟持方寸
觴獨解千古結紛紛兒女輩得喪輒嗚咽慨慷發浩歌
一笑為洗雪贈我錦繡段輸君龍縞襪應知同此心未
肯屈茲膝從革金百鍊朝宗水萬折豈念款段馬不揣
寬博褊胸中浩然氣需時一發泄見者使心降聞之須

股慄朝陽孤鳳鳴太虛衆星列宛轉似抽繭次第同比
櫛閎肆千萬言勿效塗且抹賈生真俊才孟氏豈迂濶
直道古所貴正言世方渴工巧由三折頓悟在一喝衆
心雞犬放羣言蛙蟬聒就中一轉語乃至無有說人才
無古今儒道有始卒日月既精明乾坤亦軒豁沛如縱
壑魚奮若獨擊鷗坐令齷齪者縮首看馳突匪惟當世
重要與古人匹功名殊益浪歸志甚勇決北風吹南船
順流去何疾悠悠聊自寬耿耿竟難奪和壁三獻有楚

城再舉拔撫掌拍霜鏑酒酣清興發眼將空海宇氣欲
吞恒碣男兒負竒志與世相末殺何時乘長風登天問
明月我生命在天吾道豈終絕從來君子心迴與世俗
別四海皆兄弟奚用憂離折貴爵異趙孟美色匪褒妲
勉旃思至理寤寐想前哲前哲雖已矣垂世有謨烈况
乃靈臺中源頭水長活塞予二三子追趨青瑣闥結綬
獨少君忍送出城闕江頭秋草哀天際寒蟾缺去去將
奈何臨歧愧先達

送廣東夏廉憲

天順癸未

當宁念遠氓塗炭日以極詔東在廷臣往振風紀職僉
曰御史某秉德剛且直屬耳按江右風聲甚煇赫兵政
既以舉吏弊亦以革謠言聞遠近公論推第一無如斯
人可拜手奮明勅天子曰命哉超授三品秩天語重丁
寧綸命光舄奕百僚無間言相見咸喟喟而我嶺南人
喜幸倍千百預為鄉人喜從此得蘓息特恩許乘傳陞
辭行有日走也官禁近早有半面識中心久有懷臨分

忍緘默聊為陳本末幸與垂采擇惟茲東廣地富麗自
古昔秦初已內附漢後益廣斥東西數千里十郡六十
邑衛所錯其間小大五十七憶昔全盛時承平久寧謚
家家有蓋藏人人各安適土著少流徙世業足資給士
族尚詩禮農家務耕織先期輸賦稅俛首供力役民不
受箠楚兵不識鋒鏑行旅不齎糧遠出不待吉昏夜絕
剽竊歎歲無行乞况復天氣暄地利多所獲三冬著宇
衣五月收新植山畬少汙萊水田自潮汐舟游泛滄茫

火種燒劣崩曉包趨墟飯晴着登山屐海錯富蚌蜆家
畜剩豚驅文木生山林珍貨來蕃舶荔奴然火樹橘柚
垂金實閭右食素封田圃盛嘉植愛身寧破產終訟羞
珥筆遐邇總安恬公私舉豐殖遡彼廿年前長吏恣胸
臆厚利動其中甘言誘其側欺彼民柔愚藐茲地遐僻
遂決禮義防大肆搏噬力把臂褫其衣挾口奪之食溪
壑填不滿氣焰撲難熄上下相師承前後遞沿襲豈云
無鷹鷂方自為蟲螾天門遠萬里無地訴冤抑致令仁

厚性化作兇險質弄兵潢池中延息苟旦夕外邪尋即
除中虛遂成疾蠹茲洞中搖窺伺乘間隙始惟掠近地
稍稍出復匿迹彼素脆頓異戎與貊制伏本非艱而
我狃安逸武胄恥言兵文吏諱申賊縱虎出薄林延鬼
入居宅路有橫草虞闕無一夫搯長驅捲村落乘夜盜
城壁豈彼智有餘乃我法不立歲歲轉猖披邊境遭輶
轉脅從日漸多徒類日增益居民就流散人烟渺蕭瑟
已身不自卹何暇問家室田蕪乏犢耕井渫無人汲萬

家春草青一望秋地赤禾麻種殆絕鷄犬聲亦寂昏雨
鬼火青涼月死骨白內地幸苟免因之困供億相扇咸
弗靖濡沫聊戢戢方今堯舜朝大臣總皋稷萬國俱時
雍一方獨艱阨九重赫然怒遣將搏其窻天道信好還
王師本無敵鼎魚姑假喘穴蟻難藏迹行當見掃平腥
穢永蕩滌却愁火燃岡罔辨玉與石嗟爾嶺徼人罹此
殊可惜賈父來每晚謝令去不亟由來非一朝徃者何
嗟及幸茲天日開光景方昭熠草木回生意山川增秀

色福星離紫垣甘雨隨丹軾指日下須江持節鎮南國
先聲一以聞父老懼以泣迎拜古道旁應以手加額願
言明使君代天布仁德為我招殘魂為我肉枯骼為我
作保障為我剪荆棘為我開喉吻為我插羽翼醫我眼
前瘡除我腹中匿我寒衣以裘我饑食以粒生者受我
廛死者與我裨一夫或失所孰非使君責使君今已行
行行去須急齊民正倒懸異類尚反仄如病望醫師如
旱望雨澤寄聲報吾人此公古難得瘴海行將清貪泉

不能惑佇者凋弊區復作全盛域

貞則堂

高堂扁貞則邈在台山下堂中何所有云有抱貞者抱
貞夫何如青年守嫠寡伉儷良甚宜中道遽我舍捐生
欲從之門戶竟誰把忍死待孤兒此意真不假形存心
已亡口在音如啞羸羸甘苦辛蓬垢謝妖冶侍兒體此
心伴績夜燈爇坐令野田土亦化鴛鴦瓦

七月大雨不止感之有作

端居高堂上對雨為民憂公役與私計全望此一秋禾
苗垂結實一旦俄成休仰首問蒼天天乎民何尤願言
早開霽冀得少半收我心且如此民心寧不愁颼颼風
雨聲點點吾心頭嘆息對妻子淚與雨同流嗟哉連歲
潦民病何時瘳憂思苦無計忽然想成周誰肯捐見業
三一以為溝

王推官挽章

王公豫章秀遠派瑯琊種起家汀郡幕臨事一何勇理

解牛無全善駕馬不要長官但坐嘯民吏共傾竦苑結
得爬梳善美賴愆憑持守屹山立議論肆泉湧借冠一
以聞天子錫嘉寵超升理刑職郡事咸銓總詩書用法
比何參變周孔訟謀絕寬抑囹圄無結拳刀劍化牛犢
游情還播稔沙寇忽然起八郡咸混瀕臨汀切近災相
扇亦洶洶烽火照人紅四境若草峯山居孤城危蟻附
羣盜擁外援幾逼絕內事紛控億萬口方嗷嗷恃公以
不恐彼哉肆克焰不翅石與蚌仁言利甚博老稚免系

踵餘寇侵寧化危若罍巢鼯衆方縮首觀公獨奮前捅
丁夫既爭先乘馬亦思驟至今楊柳陂過者猶卞悚名
方達帝閭目未覩清拱天何不憇遺遽爾返冥濛訃音
聞六邑老稚爭躡踊世祀羅池廟民思桐鄉冢食報不
在身有子繼晁董文名冠天下撞金抽獨蛹推恩自天
來龍章賁丘壠水若增淵淪山如益龍從我為作輓章
不厭辭費冗

雜詩

四首成化己亥

義馭行太空海宇仰其光咫尺蒼海隅羣鳥集扶桑乘
時競奮飛引脰鳴朝陽衆鳥欣有託後先低回翔冥鴻
弔孤影四顧慚且傷

其二

我聞崑崙山玄圃多珍禽向日絢綵羽遡風振華音聲
徹九層霄氣壓千山岑雲飛天靡高水擊海靡深紛紛
衆黃口斂翼知所欽一鷗來自南質小力不任倏爾叫
一聲羣然顫而喑卑卑垂其翅深入茗葦林

其三

南國有珍木中含要妙音匠氏一顧之斲削為素琴絃
以朱絲絃寄以大古心時時橫膝上山水託意深別鶴
為翔舞游魚躍幽沈云胡世俗耳不如魚與禽雅鄭竟
莫分吾心安所任

其四

冀北產良馬未必皆駒駉乘之惟其良何必以地拘我
聞開國初羅鬼生龍駒貢之入天閑用以駕鼓車疾徐

皆中節步驟何雍如紛紛內地產不能並馳驅安知今
所良在昔非其駑按索久成俗誰為焚其圖世無九方
臯嘆息還擲揄

貧叟

安成有隱士云是高密後治生實非貧而自稱貧叟問
叟所以貧叟言不自知人皆富生產我獨富詩書問富
數畜對叟惟數道德所富不在財仁義廣儲積儲積能
潤身此翁原不貧乃知多寶者無德真貧人

秋懷 二首

偶讀唐文粹張曲江秋懷詩中有宦成名不立
志在歲已馳之句有感於心因次其韻

秋風起天末木葉辭故枝泛觀草木性消息理可知
緬懷先哲言志在歲已馳業業慎永圖深恐有所疵
流光日荏苒隙駒去難羈血氣不覺衰境變志亦移
終為小人歸甘與世俗隨
瞿言道無窮孰云生有涯
雲松高天矯霜草寒披離
人生在所處卑卑徒爾為

其二

草木忽變衰惻然感我心鳥飛日向暮豈不懷故林閱
人日以多涉世日已深高官世所慕直道古所欽青青
海中山層層山上岑行行即可到決意須在今有山不
歸去何勞憶山吟

送劉紹和還南京

交游徧寰宇契合無幾人駸駸入老境落落星在晨鼎
鼎百年間會晤能幾旬况復限區域世務縈其身久別

喜相見見踈情轉親
俄頃又復去寧不合酸辛
緬懷古賢哲未必生同辰
道同心自契千里如比鄰
溶溶天上月湛湛空中雲
舉目即見之光景常如新

朱文公九世孫挺初授五經博士歸建安

宣尼去世遠六籍日以湮
道統久墜地人文孰昭陳
至哉紫陽翁妙契古聖神
遠泝洙泗流近追濂洛塵
一洗千古陋再見三代淳
坐令宇宙內百世同一春
聖皇御宸極表章右斯文
睠茲神明裔混迹同齊民
綸音遠播

訪爰得九世孫州里親勸駕來自萬里閩稽首闕庭下
天顏正欣欣錫以八品秩視茲內庭臣再拜謝九重何
以奮深恩勉旃先臣訓仰酬聖主仁斯道明日月國祚
齊乾坤

劉草窓輓章

劉均癖於詩老大意轉豪舉目一世空振衣千仞高左
顧少陵杜右盼彭澤陶瑣瑣兒女語咕囁徒嗷嗷仰天
肆大嚼對客揮長毫劑量古與今鍼砂詩與騷一一中

膏肓豎子焉能逃
惜哉抱所見
白首竟莫遭
已矣勿復道
落日悲風號

題四時小景

四首

花開雲樹明
烟歛石林豁
溪畔小舟橫
相將共游樂
游樂須及時
人生七十稀

春

其二

流水遶高山
薰風阜民財
琴中有真趣
此趣真悠哉
悠哉千古調
誰能領其妙

夏

其三

風壑雲影流霜林木葉丹窮山茅屋下幽人時往還往
還何數數就中有真樂

秋

其四

歲晚雪千林雲埋石徑深擁鑪煨芋熟兀坐共沈吟沈
吟如有待故人來戶外

冬

輓彭憲副毓敬

古人不可作古道日以湮幸哉今世中乃見如古人處

已一於道教人恒以真進以行吾義退以存吾仁古稱
壽仁賢曾未滿七旬天胡不憖遺一朝反其真我本門
下士聞訃增酸辛深為古道悲匪直懷私恩

兀坐有感

兀坐一室中蕩蕩天地寬坐看百世上宛在瞬息間開
眼無間隔身如生羽翰頓然忽有悟不覺喟然嘆女織
為我衣男耕為我食豈但我一身全家賴資給我身乃
大靈何以報天德

送鄭通判還襄陽 二首

襄陽古名郡南北於此交
山林多閒田四遠來逋逃
驅雖暫去蟻聚靡待招
歲久根株深端緒紛如毛
今君倅茲郡七載常賢勞
履歷日已深籌策行當高
因君試一問隱禍何由銷
綠林古有徵毛瓠俗所操
智者覩未萌况乃明昭昭
願謀諸同事條列聞諸朝
所貴炳幾先毋為牛後嘲

其二

我昔游新河君時猶未冠有如金在鎔氣焰已光爛京
華再見之風采殊舊觀青松既出壑勢愈凌霄漢對庭
違夙心佐郡試新宦政聲如江潮日日臨堤岸況當有
事秋一日百趣辦事機紛以沓無不迎刃斷驥足雖可
展猶自困羈絆去去宜努力莫起賢勞嘆時方需異材
九重正宵旰

送莫旦赴新昌司訓

文場撒棘後金門拜命初一官向於越仍與鉛槧俱官

以教為職身偕道為徒開門揖淵騫登堂講唐虞秩微
道則尊心閒體自舒况茲新昌邑山水清有餘襟佩紛
濟濟泮宮高渠渠名教有真樂咀嚼皆道腴燕居恒申
申進止何徐徐雖無騶從多幸自免奔趨回看利名場
佳味或不如勉哉踐實地從人笑吾迂

文江王文學輓章

茫茫宇宙內山林多隱淪白首抱幽獨沒世志莫伸所
以高蹈士徃徃增悲辛寧知造化理得失恒相因在生

雖不遇後嗣多有聞父子本同體何必親其身請看芹
水翁肥遯入江濱幸哉有賢子委質為王臣生有冠袂
榮死有銘述文耿耿不忘者浩然長獨存

送人下第其人讀禮因寄其師

禮篇四十七雜出漢儒手經曲相錯綜純駁紛雜揉大
者蟠乎天日月星辰斗小者極於地山林川澤藪微而
綏在蟬細至席埋狗有如雲夢澤物物無不有所貴擇
之精反躬行且守云胡異其見棄粟食稂莠遂揖陽翟

賈坐竝魯中叟土苴視至道千金享弊帚簸糠眯其目
至用痲適口自謂善命題對客恒自負門徑一以開四
海競奔走身心竟何益治道亦無取徒令窮經者紛如
嘆白首明能察秋毫對面失培塿我欲挽狂瀾如耕苦
無耦聊述中所見寄語平生友努力細鑽研勿嘆時未
偶

送吳旦赴南康文學 二首

匡廬古名邦山水多幽勝香爐生紫烟彭蠡涵明鏡民

淳風俗古地僻闕塵靜昔賢過化處草木皆可敬橫經
講道餘無事一游泳

其二

游泳何所適白鹿有遺基近聞鄉先達起廢重構之突
兀有新宇剝落多古碑千載紫陽翁垂訓留明規古稱

數學半曰此以為師勗哉毋自畫賢聖皆人為

白鹿書院文公

先生守南康時聚徒讀書其中近時潮陽李景齡先生提學至此重為起廢故詩中及之

題古康三洲巖

羣山勢龍從一穴空
豁訝滴乳成物象
峭壁繡蘚花土鼓有
函音丹竈無遺砂
誰云蓬萊洲此名殊
不佳我來恣清賞
疑是古仙家惜哉
竒絕景落此窮海
涯模寫不能盡
歸去鳳池誇

歲甲午予游三洲巖詢其所以名或曰郡志謂以蓬萊山之第三洲得名

語殊不經此巖天造地設瑰竒不可名狀因與郡守黃廷美議易其名曰古仙作詩賦之

三山謝處士輓章

人生天地間有生必有死
所以不死故德立兼有子懿
彼陽夏翁世居閩山趾
有如陽道州未仕居晉鄙
又如

王彥方訟者望廬止學成韜其光慶餘委其社命服自
天錫龍光照閭里俗方隨日化奄忽遽不起磷磷礪齒
石湜湜洗耳水有客過靈丘三嘆詠不已

鰲溪耕隱

隱君家何在乃在鰲溪濱讀書不干祿抱道惟自珍顧
我生茲世當為茲世民苟不耕且鑿何以供朝昏侵晨
踏禾隴帶月歸柴門豈無僮與僕耒耜恒躬親古人重
食力志在匪憂貧莘野湯聘執谷口揚稱真吾生理當

然非以慕古人

題金竹送周司訓

司訓乃庶憲之弟都尉之兄

易稱蒼筤竹詩咏淇澳篇天生植物中賦質獨貞堅箭
以用武事筠以比禮節竅之為笙簫樂奏自諧協虛心
以應世所用靡不宜託根况得地龍種非凡姿蒼松是

關

梅乃愛弟出處雖不同意氣本相似誰哉貌

關

似金衣平生鐵石心豈為外物移從來

關

時變心不變青青含晚翠當識本來面

送

闕

致仕

羣飛

闕

鴻獨長征一朝捐其羣聞然去無聲引

領

闕

濶天宇清憶昔隨陽日乘時共和鳴贊

闕

以儀于廷云胡別我去奮飛不復停我非有

兩翼蹊屬猶地行仰天遡風呼心馳身未能乾坤何茫茫世務恒營營至竟無了時何者為稱情天以老見佚人以退為榮幸免官為家况有田可耕居閒興趣便心靜思慮精游心太古初玩味羲皇經著書大明道哦詩

歌太平老我有此志亦欲接武興相期在晚節庶不枉此生

送蒲進士赴鉛山縣

科名進士重仕宦宰邑難羨爾英妙姿致身青雲端
牛刀初小試遽爾蒞劇繁一朝謝師友訖然吏民間衆目
胥黜黜萬口譁以謹寒者待我衣飢者待我餐晦者賴
以明鬱者賴以宣一身百責萃事事來相關所貴各當
理事安民斯安况當江閩交孔道多往還一事胡可苟

頃刻寧暫閒時時懷隱憂念念斯民艱民乃吾子姓財
乃民腎肝民身即我身心肉何忍剗聖朝待士厚發策
親臨軒何以報國恩民者君之天愛民即愛君慎勿忘
斯言

題畫為柯狀元乃尊作 二首

幽人事佳遯開軒對陽明興來拂瑤軫暢我平生情心
中有真趣指下無繁聲上弦叶風薰下弦諧鳳鳴坐覺
胸襟開塵滓頓以清紛紛濁世中入耳皆琴箏何當謝

塵務枕流階下聽

右琴

其二

端居閱古編雅服稱峻儒清晨掩關誦乙夜猶伊吾靜
觀天人妙達泝洪荒初匪徒掇其英亦以味道腴繼世
有賢嗣一目五行俱父積子能讀因之見慶餘

右書

題畫為蕭考功作

二首

愛此春山秀微雲淡悠悠蒼松俯深澗翠篠媚清流結
屋者誰子獨占雲山幽抱琴循側逕引領仍歸舟歸舟

天際來何時經丹丘丹丘多羽人為問相見不右春景

其二

入夏草木長林壑迴幽雅雲際川光浮石罅巖溜瀉誰
當三伏中高會江亭下倚席和棹歌縱目極平野鷗波
浩蕩間羨彼舟游者臨淵空有言結網人何者右夏景

隆壽堂為陳宗堯作

堂名摘誥中語

敬親則子悅尼父有遺言况乃萬乘尊體恤尤拳拳匪
徒榮其身且復期以年大哉隆壽語昭昭日星懸臣心

一念私欲言不能宣吾皇一視仁先得所同然人欲天
必從壽命或可延薰沐誦聖謨大書扁堂前堯言萬世
見舜孝千古傳親生信多幸荷恩良獨先耄期尚康健
非天曷能然感激無以報矢心籲皇天稽首長樂宮慈
算億萬千

分得函谷青牛壽楊維新學士叔父

聃也古至人聖稱其猶龍獨立萬物表蔚為道德宗蒼
姬將訖錄質質無適從中國雖有聖駕車西向戎青牛

馳道路紫氣騰虛空我我函谷關往來日憧憧賢哉尹
喜氏獨能識仙蹤鬢髮紛白雪顏面如芙蓉前身廣成
子後身河上公變幻千百億混迹人世中寧知千載下
不復有此翁白章高尚士夙志希玄宗潛心五千言夢
寐如或逢神爽默享契壽算期與同後天長不老浩劫
無終窮

書百牛圖後

我本農家子兒時曾作牧倒騎牛背上簑笠吹橫竹老

大客京國久不見此畜忽然覩斯圖心若有所觸泛觀
天下物無物似牛犢既以拽犁耙又用轉車轂為我運
百貨為我生百穀論功亦莫比論苦亦良酷云胡世上
人甘心肆口腹既然食其力何忍食其肉水陸珍百品
物物可充欲孟子有遺言不忍其穀觶

題竹送高博士使高麗

青旌懸翠旄龍竿綴鳳尾持出大明宮搖搖向東指氣
節橫九秋風聲揚萬里坐使三韓人快覩古君子

題何太宰水南別墅為其子廷秀大司寇作

伊昔鈍齋翁卜築得幽勝山敦魯叟仁水湛伯夷聖野
趣隨意成清音入聽瑩既如溫公園亦有楊監徑至今
沾漑餘歷歷起人敬有子繼芳躅名位晚相竝旦夕乞
身閒歸去修治命溪山不改色風月有餘興手澤潤尚
滋心境閒常靜橋梓賦形殊松栢受命正物在人不在
事久天亦定

敬所為蔣敬之作

古人敬作所日夕處其中出入與起居恒與此所同居
憩以為室游寓以為邸行於此中行止向此中止
莊誦敬夫銘服膺晦翁箴非徒所其身將以所其
心心心在此所所至如戴天惺惺重惺惺白首相
周旋

弘治初元春二月十五日皇上躬耕籍田臣濬
叨在九卿之列預行九推禮感而有作

我本農家子世業在犁鋤生來好詩禮舍農去為儒筆

墨其耒耜經籍乃蓄畬脫迹田舍中致身承明廬日食
太倉米八珍頒天厨不知稼穡艱豈解耕耨劬云胡七
十年乃爾復其初大君初出震詔言戒司徒於時仲春
候協風來徐徐發趾向辰地先耦乘芝車聖躬勤三推
黛耜親手扶老臣亦何幸九推續其餘仰面瞻睟容反
躬思微軀百畝臣恒產萬里臣家居自合老蝸室寧期
從鑿興喜極忽興感清淚霑華裾獻罷藉田頌歸把種

樹書

漫成

夕陽昨陰翳朝陽還繼升萬物被輝耀炎光正熒熒浮
雲起咫尺白晝仍冥冥世無駐景戈空懷百尺繩

重編瓊臺藁卷一

欽定四庫全書

重編瓊臺藁卷二

明 邱濬 撰

擬古樂府

公莫舞

公莫舞公莫舞不必區區聽亞父霸王百行掃地空不
殺一端差可取咸陽宮殿成劫灰三秦城邑衝殺機云
何居巢七十叟不及外黃黃口兒公莫舞公莫舞公舞

徒為爾天命由來歸有德不在沛公生與死

將進酒

君不見劉伯倫又不見李太白平生嗜酒任天真留得
芳名播無極頌酒有德以酒為名入地為酒鬼升天為
酒星醉來一任兒童笑醉倒不承天子詔老眼熒熒今
古空大量恢恢天地小酒中有趣世莫知二子所見真
瑰竒古人已去不可追今人不飲將奚為我起歌君酌
酒一曲還須一杯侑人生百歲幾何時昨日紅顏今白

首

採蓮曲 二首

蓮花紅蓮葉碧紅似妾容粧碧如妾裙色輕紅易落碧
易衰情人道來竟不來停橈轉棹日過午藕絲斷盡蓮
心苦

其二

荷花香荷葉長紅粧奪儂目綠刺牽儂裳纖纖玉手搖
蘭漿傍葉看花恣遊賞須臾採得滿船歸一曲清歌隔

江響採蓮採蓮難療飢不如採桑堪作衣

搗衣曲

己巳冬寓北京作

涼颿透窓紗蕭蕭弄秋色妾在江南尚不堪况君遠在
陰山北風吹妾衣寒妾念君衣單起來搗衣明月下不
辭膂力推心肝一聲孤悶添兩聲雙淚墮三聲四聲情
轉多無數離愁搥不破須臾搗到千萬聲中有萬恨千
愁并不知遊子在萬里今夜魂神寧不寧

對酒行

我有方寸地中涵萬古天幾回欲施布地步狹且偏起
來行摩挲天地萬物如我何天地若不寬萬物苦不多
滄海沿蕩蕩而豈蟲能測碌碌伯倫輩何止容數百欲
作郝隆晒却恐金烏斂彩陽光敗欲作仁裕洗却恐天
吳震懾波濤起韜鋒晦迹且隨時磊磊落落徒爾為不
如放出別腸三百丈停蓄丹田為酒池甕頭飲醉甕底
卧開口笑歌拍手和倒囊傾出千黃金鑄取仙人劉白
墮

短歌行

一日生一日落明日不如今今日不如昨短歌行聲苦
惡人生行樂須及時腰纏何必揚州鶴

花游篇

和楊廉夫韻

雲樓霧閣深濛濛弱流萬丈號天風姓名久注丹臺裏
浮槎直泛銀河水凌空八翼飛天門若木不冒蛟綃裙
天衢空濶舒禹步俯瞰人寰惜丘墓一聲鍊笛下天來
擬借重湖為酒杯珍珠落槽冰在梳雪兒歌唇玉奴板

天邊一任烏輪西拂塵掃石題復題鸞儔鳳侶隨蝶使
爛漫芳遊日三四醉揮彩筆掃雲箋試寫神遊八極篇

綠珠行

交州使者洛陽客白日却商富財帛金鞍寶馬擁旌旄
萬里南行日南國征車曉過古白州江山秀麗多嬌柔
不惜明珠三十斗買得佳人如莫愁歸來金谷園中住
鎮日張筵盛歌舞手心擎出夜光珍回視羣姬等泥土
四時行樂春復春懽笑不知天有晨豈知我愛人亦愛

側邊已有窺伺人鵝生地底中台折白晝中原行鬼域
黃金無權錢不神欲庇嬋娟苦無策高樓重重舞且歌
樂思何如憂思多按圖索駿思必得珠兮珠兮奈爾何
奈爾何為爾死思愛誰知止於此忍教白壁屬他人注
目相看淚如洗君以貌愛妾妾以心事君寧在君前死
為鬼不向賊邊生作人百尺樓頭不見地奮身一躍翻
空墜三斛明珠易一珠一朝紛紛如粉碎誰知荒僻山
海涯天亦生此明媚姿不獨貌妍心亦正嗚呼但恨不

似後來金源氏之葛王妃

湘江曲

湘江之水清瀾瀾流下零陵會瀟水沿江兩岸竹低垂
斑斑盡是英皇淚竹上淚痕江心波千秋萬古哀怨多
君山香火常不斷行人誰復悲汨羅

桃源行

桃花片片隨流水漁郎誤入桃源裏水盡山開忽見天
地靜居幽俗淳美忽然相見驚且疑是人是鬼公邪私

曾聞長老談往事莫是築城人遁歸詢問方知闕 訖

世歷三朝年六百當時但道秦人強誰知更有強秦國

自言家世本闕

六國滅盡吞於秦懷王不歸負芻虜

至今猶說春申君征誅百出無窮已武陵道上人如蟻
深山深處幸逃生免作長城城下鬼自耕自食無拘攣
舉頭但看青青天城市不通惟食淡山中無歷豈知年
自入山來忘世態故老消磨童穉大此事前人死未聞
回首相看增感慨增感慨將何言山間未必如世間世

間無奈苦多事不如山間聊苟全嗚呼人生不幸逢末世不見唐虞太和治含哺而嬉鼓腹遊世間亦與山無異

登高丘而望遠海

登高丘望遠海身居岷壘間目極蒼茫外神遊八表縱大觀氣噓千丈發長慨直從混沌鑿破初大徧虛空無盡界天於子會開一元地從坤隅分兩戒山萬重水千派神禹勞勞躬四載

闕

途闕聖迷海上神山六鰲

戴波濤洶洶泛蒼溟沙漠茫茫連紫塞豈天下百川皆
清漪一流入海便成緇茫茫不復辨涇渭混混孰與論
澗溜洪濤巨浪轟轟怒不覺已身如穢瓠看來何似山
下泉清香凜冽為人慕我向潮頭三嘆息志欲澄清勢
未及願言上帝檄天吳一夜無波便成碧

讀東坡詩

東坡居士真天人文章豪邁如有神光焰豈但長萬丈
筆端真可幹千鈞萬斛源泉隨地滾玉盤明珠無定準

號國夫人控玉驄淡掃蛾眉却脂粉風霆翕歛一時來
須臾雨霽烟雲開虹收電戢星斗爛一天明月光昭回
此翁落落不可得謫仙少陵乃其匹小兒淮海秦少游
大兒豫章黃魯直前生合是永禪師後學宜稱韓退之
玉堂金蓮不足貴羅浮瓊海真瑰竒誰云賦詩不中和
餘子碌碌真么麼眉山至今草木枯五百年來生一箇
海南遺迹有雙泉我家依約雙泉邊雙泉湮沒不可見
山城落日生雲烟

寄符鍾秀求所作

聞君新詩多學杜春來花鳥添愁緒胸中太學萬卷書
脚底關山幾程路天邊鴻鵠未易羅草下蛩螿何足慕
少陵光焰萬丈長愛君憂國有深趣漢庭老吏三尺律
柱下相君九章數白衣倏忽為蒼狗處女斯須如脫兔
運斤不動斲鼻郢闕弓命中射戟布跋牂漫爾上嶠岬
蚍蜉何用撼大樹前三語後須用轉不二門中在深悟
堅消要辨玉雪姿昏巧當知瓦金注學柳無如魯國男

效西易似東家婦嗟予癖性耽古詩知君每有驚人句
願求一破蟋蟀鳴會須為下蟲魚註

以上少作

題李將軍四時行樂圖

四首

日華淡淡雲陰薄兵衛森森擁鈴閣
旌旗不動柳風輕
劍戟無聲花雨落將軍新試越羅衣
兩袖春風拂地垂
閱遍三軍超距樂晚涼乘興詠歌歸

春游細柳

其二

松風流響團涼影翠濤翻空火雲冷
一軍無事枕戈眠

萬馬不嘶清晝永將軍燕坐凝清香靜對珠鈴萬慮忘
不用更揮諸葛羽溶溶心月自生涼

夏坐松林

其三

霜染楓林秋氣肅潦水收痕山露骨蒼鳩一夜化為鷹
百鳥含羞傍林麓將軍小隊出西郊金環壓轡青驄驕
霹靂一聲軍吏賀半空雲外落雙鷗

秋郊挾彈

其四

凍雲不飛朔風直野獸畏寒出遠沒角弓鳴髑趁蟲飛

霜鏑吐芒驚鬼哭將軍自控五花驄翩翩雲騎爭追從
射殺南山白額虎碧油幢底夜論功

冬野行圃

雲山清趣圖為歐陽道人作

山矗矗雲漫漫雲容山色微茫間一天淡月秋空靜滿
地落花春雨寒道人愛此有清趣穿雲結屋依山住一
縷茶烟午夢餘兩腋清風欲飛去欲飛不飛無限情拂
絃時作太古聲驚猿吐月淚潛墮老鶴知更相和鳴夜
深萬境俱岑寂兀然虛室生寒白回頭人世隔紅塵雲

山慘淡無顏色

嚴子陵圖

長笑劉歆頭不及嚴陵足
厥角稽首勢若崩况敢橫足
加帝腹嚴先生何壯哉釣臺豈但高雲臺清風遼邈一
萬古落日頽波挽不回

壽萱堂

人生有至願不在富與貴萬斛明珠未足珍九錫殊賜
底須恃但願堂上白頭親年年康健春復春萱花日日

香萱葉日日長宜男男益壯忘憂憂漸忘五綵為衣玉
為酒歲歲堂前慶親壽

丁卯舟中望鞋山因憶解學士弔李白詩戲作

舟次吳城山遙望彭蠡湖匡廬五老時隱現大孤小孤
如有無眼中鞋山青兀兀世間安得許大足始信防風
氏真有專車骨不知天公肯借不我欲躡之湖海游等
閒踏碎黃鶴樓等閒踢翻鸚鵡洲驚醒采石李觸起耒
陽杜更游赤壁邀老蘓倡和鳳凰臺上驚人句鳳凰臺

金日府三言 卷二
江之東龍盤虎踞高隆隆脫鞋濯足大江水鳴玉矩步

朝九重

歲丁卯過采石弔李白

采石江頭黃土一坏東有蛾眉亭西有謫仙樓謫仙仙
去不復返惟有江水日夜流人生一世幾何久不如眼
前一杯酒飢來文字不堪餐死後虛名竟何有請君看
此李謫仙掀揭宇宙聲轟然長安市上眠不闕

唐馬篇

開元考牧千百羣谷量色別如錦雲金羈繡韉盛粧飾

新水香篋調息勻縱橫六印帶官字牽出長街多意氣
奚奴屏息不敢騎路人斂迹遙迴避昂頭高步踏軟塵
倏來倏往如有神四海風塵那敢動鐵騎奮迅應無倫
漁陽鼙鼓一朝起四十萬匹駢頭死獨餘一匹真乘黃
負載君王蜀山裏蜀山西去棧道危此時郎當將語誰
張郎不來哥舒去獨乘千里將安之九折坂頭泥汨汨
據鞍穩坐伊誰力平時飼餼非不多逐草奔泉各南北
古來良驥惟稱德一匹勝如千萬匹今觀此畫殊不凡

天骨開張森獨立豈是三郎舊所乘錄功別養當時平
詔令畫史為圖形千年神駿還如生千年神駿還如生我
一見之心神驚何當房宿重降精再使騏驎地上行

瓊林醉歸圖為同年長垣李溥作

奉天殿上傳臚罷日照金門榜初掛中使傳宣勅大官
明朝錫宴南宮下張天為幄雲為茵金盤犀箸羅八珍
宮花剪綵來中禁御酒分香出上尊鼉鼓掀天播欲破
梨園法樂喧相和妙舞清歌次第呈幻形竒技紛紜過

承恩侍宴皆貴臣繡金孔雀銀麒麟焚香望闕北面拜
共賀官家新得人白面青年三五百人似神仙氣如虎
潛泉浮酒不知數兩袖翩翩欲飛翥瓊林宴罷日斜時
馬蹄得意去如飛團團皂蓋空中舉短短絲鞭柳外揮
微風不動香塵軟十二街頭簾盡捲衣裁草色碧將流
旗拂杏花紅尚淺金環搖轡穩於車笑拍吟鞍不用扶
恥向平康問花柳還歸槐市枕詩書明日半醒扶醉起
吮筆題詩謝天子就中醉者誰最豪中原才子長垣李

題望雲圖

輪輪困困鮮且明浮光呈瑞表壽徵觸石起從秦
山出雨下土兮滋萬物有如春暉煦草心亦似凱風吹
棘針母恩如此莫可報望雲再拜情何任情何任意無
已目極天南萬餘里越王臺上陽生時焦子初黃蟹正
紫高堂綺席倚雲張紛紛兒女羅酒漿就中獨少讀書
子挾策多年遊帝鄉帝鄉迢迢歸未得對此佳辰應惻
惻馳心直與雲天高恨不將身在親側蒼天漠漠雲悠

悠雲色還如親白頭
孝誠一念感穹昊
雲影為之凝不流
何事良工心亦苦
筆端寫出心中語
紅雲乃采捧天庭
白雲片片迷江樹
紅雲影裏望白雲
白雲如舊紅雲新
裁雲作衣雨為酒
共祝君親千萬壽

淮之水送淮安林馬判

三首

淮之水清瀾瀾
山陽古郡淮之涘
逋仙之孫古君子
似是馬曹官自理
何以况之淮之水

其二

淮之水清湜湜郡疆遠跨淮南北林侯秉心淵且塞民
不知勞馬繁殖誰其致者侯之德

其三

淮之水清徹底沮洳浸潤幾百里山陽太守差可擬一
時僚佐皆肖似餘波漸漬良有以

題林以善畫送王琚

近代翎毛誰最工邊家父子誇獨步羊城林氏雖晚出
筆勢飄飄有天趣仁智殿前退直時虛窓盤礴窺天機

毛生點頭墨卿舞意氣所至皆神奇飛者自飛宿者宿
色形神氣無不足等閒尺素落人間坐使山林在華屋
嗟嗟百鳥皆天生結巢穀哺方成形胡為獨奪造化妙
眼前倏忽飛且鳴我從故人得此幅每日朝回洗塵目
吾家外弟別我去輟贈慙慙表衷曲故鄉南去更千岑
對此還思別意深物類尚知相聚樂矧伊人矣不如禽
竹庭為表秉中作

綠雲垂空寒欲滴窓外蒼龍作人立有時鼓鬣風中號

有時垂涎雨中泣既如軒轅遊洞庭鏗鏘仙樂天半鳴
又如李靖發田舍滴漑天瓢雲外傾中有書生負奇志
千金學得擾龍技辛勤十載謹護持坐使騫騰滿庭內
只愁天作雷雨風斯須變化出九重雲收雨散斂神功
但見葛陂萬丈深潔潔

秋窓詩為羊城義士袁鑑作

一年之氣秋最清窗涵霽色偏澄明萬條疎明斜碧入
一點圓空虛白生坐間四時如一日凍雪炎風不相及

筠簾晝捲寶鳧微
緜帙午寒金甃濕
千崖氣肅天宇高
紛紛水葉飄林臯
丹桂涼蟾香散亂
碧桐疎雨冷瀟颯
浩然幽獨者誰子
終日栖遲此窗裏
平生志節明如霜
一片精神澹如水
霜明水澹秋更宜
凜然相對清以淒
孤高遠慕伯夷聖
搖落不作宋玉悲
秋行屬金德為義
見說承家多義事
十尋雲棟勅旌門
五色天書金作字
義聲久著越天涯
冠蓋過門每軼車
何日南歸經錦里
為渠重放筆頭花

題金臺夜雨卷送范文主事乃兄

幼年膝下同遨遊
此時間雨不解愁
壯年遊宦感離別
方識此聲最淒切
切切復淒淒
滴滴落肺腑
天然骨肉本
鍾情不為燕山今夜雨

哭年尚書

平生不曾受公恩
亦復不曾登公門
朝事聞人報公死
不覺淚隨聲
潛吞出門仰天長
太息日色慘淡雲昏昏
正色居然失一黠
振落焉用千公孫
齊人之桃本非刃

晉士之死猶不言居鄴老人不得志氣結血滯心苑煩
安昌坐待牖下盡晉江甘向池邊躡攫肉千彈猶眷戀
覽德一下俄高騫物情高下胡懸絕天理茫昧難究論
公身雖死心不死巫陽不用招其魂上為日星麗層漢
下為河岳巨厚坤人生百年等一死公乎千古名常存

榮節堂

門前綽楔當亨衢楣間鳳勅黃金書堂前老姥壽且健
榮恩高節誰能如歲時有客登堂拜髮白還黃千百歲

嗚嗚咸稱女丈夫死者可生生不愧夫死骨不朽子大名已成已將姓氏達天陞更荷絲綸來帝庭心如古井水風起波不興節似冬林松霜寒葉不零明明天日照井底漠漠慈雲護松子松子成林千尺長終作棟梁清廟裏

題松送崖州洪千戶襲爵回

攢峰峭壁漲海涯蒼松老去長孫枝莫言幽僻無人見會有崢嶸頭角時蓄明勿作炬含液休流脂烟霞深處

善自保風雨狂時宜避之結成三千年琥珀養就四十
圍霜皮老我玉堂翹首望看汝聳壑昂霄風聲四遠馳

題友人陳汝諧璞墩

其家舊有桐墩

昔君築墩當近林種桐十載期製琴今君築壑向遠壑
移石千山期得璞晨昏來往兩墩間功名富貴皆等閒
有時哦詩石上坐有時拂軫桐陰彈鳳凰枝老秋蕭索
却傍雲根事耕鑿琅玕箇箇拂雲長玉屑霏霏逐風落
一溪流碧彎半璫泉聲琮琤鳴珮璫山含輝兮木含潤

人言此地如崑崗瓊枝琪樹羅階砌夜深疑有白虹氣
藍田餐法曾試無北平種子應生未我家城西君城東
梯雲石磴遠相通別來茫茫隔煙海置身遠在羣玉峰
何時對子盧胡笑把酒同澆磊砢曾

岳王墳

我聞岳王之墳西湖上至今樹枝尚南向草木猶知表
蓋臣君王乃爾崇奸相青衣行酒誰家親十年血戰為
誰人忠勛翻見遭殺戮胡亥未必能亡秦嗚呼臣飛死

臣俊喜臣俊無言世忠靡檜書夜報四太子臣構再拜
從此始

輓羅都御史

正統己巳北人深入當道者建議趣召宣府總
戎官率兵入衛京城或欲遂棄其城衆紛然爭
就道時羅公為都御史巡撫其地乃毅然仗劍
坐當門拒之且下令曰敢有出者手斬之衆遂
定口外人至今能言之而修宣府志者亦載其

事公平生事業固多而此舉猶為卓偉抑菴先生作墓志畧不及何也濬初來京師時嘗拜公於寓所極蒙獎諭及濬登朝公已致仕家居不久捐館舍矣辨香致敬其道無由茲因其壻鍾轅應貢來致其子泰命求輓章因次第完城事為韻語以補公志之畧云

六飛北狩無消息邊城四望狼烟赤塞馬長驅去復來
何人却建捐邊策鎮朔將軍生入關北門鎖鑰空餘鏢

強兵健馬盡南走黃塵蔽日天漫漫白首憲臣南海客
手持一劍當門立誓與孤城同死生怒髮衝冠氣千尺車
輪生角馬駐蹄居人不動行人歸叱咤之間樓櫓具金
城錢壁湯為池雲州失守赤城破敵人躡足城邊過老
妻稚子盡登陴公亦援袍雪中坐山前山後無數城此
城屹立如巨屏邊騎南來資扼塞王師北出恃屯營屏
蔽京師功卓偉謾有長城長萬里江淮果賴張真源河
朔僅餘顏御史憂國勞邊兩鬢霜事成乞骨歸故鄉肘

金腰玉者塞路無人上書訟陳湯一葉扁舟五湖水漲
海邊頭亂山裏折簡不通朝貴書抱膝長吟聊爾爾羅
浮山崩天墜星乾坤一夜收英靈公兮生死已無愧邊
人至今嗟未平邊人能言不能紀慚我鄉生官太史聊
述人言作此詞書罷長歌淚如洗

望雲思親

白雲在天不可呼仰天望望增煩紆蒼茫四顧宇宙濶
去住彼此無寧居昔人望雲憶親舍親舍依稀白雲下

君今望親不可留何處荒臺閱長夜長夜漫漫無復晨
舉頭見雲不見親誰展白雲書楚些臨風為爾賦招魂
魂兮去去招不返沒齒白雲長在根

送張端

纔見挾書來又見拂衣去出門大笑氣如虹閩海萬山
如跬步男兒四海志婦人不下堂名駒墮地走千里生
男三日垂蓬桑功名富貴身外事得喪悲歡須底計君
今歸去蚤歸來莫向山林久淹滯只今蒼頡茫昧伯喈

亡待爾重刊石經字

梅花為儀曹主事彭君題

君不見一陽之氣昭窮泉此花獨為萬物先又不見一
年生色凋零遍此花獨為萬物殿百花未開獨早開挺
挺出色花中魁百花落盡獨不落凜凜自守歲寒約世
間草木紛且繁能紅能白呈嬌顏花朝月夕競歡賞朝
開暮落斯須間何如此花獨得造化理萬物資之作終
始誰云姚魏花中王評量只合輿臺比世人愛色兼愛

香繁花疎影爭誇張就中道理少人道對圖一笑天蒼
茫雲慘淡十年不見真花面扁舟何日遂南歸羅浮庾
嶺重相見

六龍圖

顯蒼生萬類行天莫如龍純稟至陽精卓為鬼物雄大
小靡定形去住無常蹤一之已難見况乃六者相騰衝
一龍昂首揚其鬣奮起直上擎虛空一龍掉尾出淵泮
迴身轉脊如宛虹其餘兩兩峙相向戲弄明月雲濤中

矜牙露其爪氣勢何寧兇是時元氣濕濛濛河海起立
地天通鬼神晝泣真宰怒呵叱屏翳驅豐隆嗚呼神物
變化不可窮胡為羣聚如昆虫無乃畫工巧為此潛以
翰墨偷天功君不見古來好者稱葉公真龍聞之降其
宮又不見近來畫者有洞微馬龍現相來相從君從何
處得此本彷彿似是陳所翁精誠感通理或有慎勿輕
易為點瞳會須一夜波濤去轟雷鼓驚天風澤下土霑
耕農霖雨普被垓埏同

竹林七賢

太行之陽脩竹林昔賢於此閒登臨江山如故人何在
空有清風傳至今晉人曠達尚元語棄置禮法淨如土
神州陸沈二百年當時豈但王夷甫

竹溪六逸

徂徠之山竹滿溪溪中流水清漪漪昔人已往不可見
至今陳迹猶依稀酣飲狂歌者六子就中最豪孔與李
為龍為蛇誰豫知白也逃生巢父死

海屋添籌壽徐助教

茫茫瀛海浩無津弱水無力勝纖塵中有仙山三萬八
千里平地拔起凌蒼旻瓊臺玉宇金銀闕罡風盤旋舞
香雪琪花不落瑤草芳天氣長如二三月朱橘如斗蓮
如舟脯蒼麟兮駕紫虬木公金母互來徃天鹿人鳥時
嚶呦銀濤凝碧漫山麓山麓渠渠列華屋黃金布地玉
為階五色雲霞長蓋覆屋中插架皆仙籌非金非木非
琳球連楹克棟十餘屋堆積高並崑崙邱山中老人若

童孺洗髓伐毛知幾度桑田變海海成田下得籌來已
無數仙境變幻無定居仙人綿邈不可呼誰知仙凡了
不隔人中亦有列仙儒列仙之儒服仁義不乘風兮不
御氣辟雍環水如道山衿佩趨庭總仙裔考古直遡盤
古時積書多與桃核齊仁人自爾享遐壽海屋添籌徒
爾為

題山水圖

昔年棲迹雲林下舉頭見山不見畫如今置身朝市間

開眼見畫如見山山耶畫耶孰真假具眼之人世間寡
景當好處背起樓趣到佳時急驅馬居山不見山中佳
厭飫林壑輕烟霞一朝別山出城市黑風黃日昏塵沙
廣庭曲巷通幽處壘石栽花修勝具眼中彷彿雖逼真
畢竟人為靡天趣回思舊隱隔世間欲一見之千萬難
殘縑斷素纜尺咫傾囊倒篋不復慳君從何處得此幅
千里雲山數間屋遠山淡淡橫翠眉近山亭亭削青玉
山頭處處飛白雲樹頭樹尾晴輪囷平林忽斷天光露

暝色遙連雨氣昏蒼苔白石羊腸路平麓盤盤幾家住
就中老人華陽巾手把瓊芝滴清露山光水色相渺綿
漁舟泛月江吞天長風浩浩起天末高堂白日生雲烟
興來却憶竹鶴老見畫何如見山好人生即景須盡歡
尋仙何必蓬萊島

蟬聽軒為常州謝同知題

世間何物聲最清秋高嘒嘒寒蟬鳴常州別駕日無事
公餘徒倚軒前聽物聲妙與人心合聲入心通無限樂

鼓吹何須兩部蛙，淒清絕似三更鶴。初聞一聲如撥絃，
含商轉羽如有言。一聲未已一聲續，千聲萬聲斷復連。
夕陽欲下雨初霽，樹影不搖風細細。奏出千腔雅樂聲，
帶得九秋玄露氣。有如伯牙鼓瑤琴，鍾期聽音知其心。
又如南郭聞天籟，至理在心不在音。天機氣到自然應，
隱几坐忘真聽瑩。承蜩手與此耳同用，志不分神乃定。
忽然飛去君不知，目中彷彿當垂緜。聲殘響絕寂無有，
但見委蛻黏高枝。

送張茂蘭黃自立二同年回南京

前年棹鞅翰墨場英雄三百齊翱翔青雲滿眼多契合
就中最厚張與黃二君英英氣如虎明目掀眉論今古
酒酣拂劍落霜花興發揮毫灑秋雨今年同自江東來
我一見之心眼開長鯨吸海海欲竭巨靈擘山山為摧
摧山竭海懸河口風雲變化龍蛇走盤古以來二百二
十餘萬年一一成敗興亡如指手相看一笑氣味投典
衣沽酒鎮日留憐翁侍吏共驚訝平日見我曾有此客

不此客何昂藏此主大癡絕牙關齟齬金聲口角斷
斷飛瓊屑帝城春暖百花香軟紅塵土飛悠揚明朝馬
背向東去燕雲一碧天蒼茫燕雲不斷吳雲起兩京相
望四千里桃葉渡頭生碧波清夢隨君渡江水

四友圖為安成劉進士秩之父作

三友松竹梅其間一友我萬物於人同一理意契神交
無不可君不見明月在天光在尊李白對影成三人又
不見書酒琴棋集古錄醉翁與之合成六古人將身混

物中游心太古窺鴻濛此翁妙得古人意白首山林無
物累每將富貴等浮雲却與幽貞結深契左挹大夫袂
右拍君子肩羅浮美人相後先翁居其間吟且嘯一笑
相看同歲寒市道豈所論金石未為堅耐久且莫逆忘
形更忘年

尼邱山壽封給事中孔公

尼邱山高高幾許平睨岱宗小齊魯下盤坤軸橫萬畝
上切穹蒼纜尺五自從天一生水凝且聚屹立巍巍莫

東土油然作雲沛然下雨發生草木滋禾黍毓秀鍾靈
澤斯溥彼東方之人兮仰此山以煦嫗夫誰知天降元
鳥興商祚始契歷湯六百祀啓封於宋迄孔父鄒邑大
夫顏氏姥禱茲山兮帝眷注乃為斯文誕宗主吾道不
喪天後世重見古山之功兮誰與伍天地賴以位人極
賴以樹邇來一千九百歲五十又八代孫曰忠伯甫讀
書耽古道篤行踐前武出言制行不敢同常人跬步惟
恐羞聖祖少年挾所學哀然奮高舉姓名蚤已登天府

高堂有親待我哺親在遠遊違祖語寧向雲林老布衣
懶趨朝市縻簪組閒締青松盟靜結白雲侶蕭然四雨
軒不博萬金塢七十四年樂詡詡教子成名登諫輔載
筆螭頭侍當宁幸逢上號尊皇母錫類推仁遍寰宇一
旦蒙恩膺典數七品宮袍白鷺翔五色天章彩鸞翥帝
心嘉汝方簡在皇覽揆予又初度瑤席張斑衣舞三子
六孫羅膝下穀核維嘉酒維醺年年歲歲屆斯辰常對
茲山祝純嘏山峩峩人俟俟氣勢兩相高壽算同堅固

家有軒曰四雨

風木圖卷為鄞江錢侍御乃尊作

樹欲靜風不休子欲養親不留人生此恨同今古當時
豈但臯與由問天天不言叩地無路寸心莫報春暉
長百計難迴白日暮君不見燕趙良家子棄親事戎行
一朝崛起封侯王推恩及親許改葬賜以東園祕器玉
魚金盃填黃腸坐令枯骨生輝光又不見山東章句儒
辭親遠遊學一朝徒步登臺閣推恩及親蒙顯袞賜以

五花官誥金函玉軸翔鸞鵲坐教死魄膺穹爵黃金寵
錫非不多九重優錫誰能過富貴來時親已逝縱有榮
光奈爾何所以孝子心拳拳惟愛日日復日兮歲云徂
志願未酬所期失茫茫四顧將誰從依依一身無所容
人生到此嗟何及養薄徒勞祭薦豐古有臯與由今有
錢氏翁來今徃古此心同同此心同此恨此恨終天不
可窮不在木不在風只在區區方寸中

題李都督虎

陰雨颼颼振林木百獸魂飛草中伏舉首為旗尾作旌
白晝橫行誰敢觸汝虎雖猛何如人慎勿夜逢李將軍
將軍射石尚沒羽薄肉淺毛何足數

題揚廷玉忠義

幽燕自古多奇士勃勃胸中抱奇氣要留世上不朽名
羞見人間不平事金臺峩峩易水寒相逢意氣何桓桓
君臣義大此身小問甚鴻毛與泰山荆生不還田生死
地氣翻為時勢使西風吹散壯歌聲百鍊精鋼柔繞指

文皇建國來全燕風聲震地雷轟天聲明獨出百王上
風氣還回三代前關西後裔范陽客二十辭家侍君側
出入勾陳太乙間一片丹心皦如日落落身無七尺長
忠肝義膽無他腸前年持矛刺狂賊去年上書論流叱
有勞不伐言皆應四民按堵三邊靖丹心自結明主知
時時持節銜王命禁庭之獄非等閒生死都來掌握間
昨日九重親錫命三軍百姓總開顏好生惡殺天之道
聖主仁明法天造揚君揚君聽我歌臣心盡處君恩報

送彭郎中彥克

歸田樂歸田樂為圃為農殊不惡便從天上謝朝叅直
向山中事耕鑿朝登東林臯暮陟西山壑款段四蹄牛
八角一心坦坦有餘閒四體舒舒無繫縛春早耕秋晚
穫捐却簿書痔錢鑄田翁野老時往來淺種深耕共斟酌
任從紅日升不管銀蟾落朝鼓鳴時眠正著竹葉杯
深寬放懷蘆花被暖長伸脚也不慕登膺龍門也不羨
騎揚州鶴偷眼看他嚼復嚼詳箋一部種樹書淨寫數

行賈僮約足不躡宰錦窩夢不到天祿閣睡餘支枕試
尋思往事真難供一噓人生只怕老來忙世事何曾閒
裏錯預為諸季歸老圖重把祖基大恢拓隱居歲月便
從今仕宦程途休論昨身邊無累心無憂萬事無如歸
田樂

懶詩為莆田許氏作

甫中有懶士踵門求懶詩君但懶於事我乃懶於辭君
來索詩日數次我欲揮毫俄又廢看來我更懶於君所

以深知懶中味懶中滋味人知少第一是閒次是睡古
人何人最好閒陶令棄官江上還閒中却作閒情賦胡
為屑屑不憚煩古人何人最好睡老搏翻身驢下墜睡
餘却詠好睡歌無乃勞勞愛多事問君之懶何如哉曰
吾喪我忘形骸過午枕頭方擁被一春履齒不沾苔也
不學莊叟逍遙遊也不學龐老團圞坐任他門外事如
天管甚鄰家燈是火千呼萬喚纔欠伸十迴九轉難出
門時人但見應世懶就裏誰知學道勤一年三百六十

日日十二時時八刻閉門搬運紫河車畢竟勤耶是懶耶

題山水圖

一氣流行天地裡結者為山融是水世間何處獨無之
舉目孰非仁智理人人有此智與仁奈何好假忘其真
尋常登涉厭險峻却對圖畫融心神得非作宦風塵下
擾擾塵勞苦無暇層城深院鎖重門景色無由到官舍
我聞逃虛空者見似人而喜况乃平生舊棲止驀然相

見楮素間有如縮地來千里山勢高低斷復連江流抱
村涵遠天山中有寺江有船故鄉彷彿橫在欄檻前記
得當年讀書處白沙翠竹江村路多年古樹歌欲倒鎮
日間雲飛不去溪中魚可羨圃內蔬堪茹載酒携琴多
故人戶外時時恒滿屨山中景景多趣夢中時作着屐
遊覺來尚憶尋芳句久動思靜心懸懸樂哉斯邱今在
若箇邊對圖忽悟樂壽意三復淮南王小山叢桂招隱

篇

題草蟲

春雷驚動蟄蟲起日暖風和花弄藥肖翹蠕動飛且行
盡入君家畫圖裏問君何從得此圖仁智殿前揮灑餘
門來細玩格物理有如一部埤雅書

畫菜

世間食品何者佳淡中滋味真無加富客何須悅芻豢
神仙謾爾餐煙霞聞君作縣官河側繞屋築畦供日食
食餘摩腹繞園行喜得邑民無此色

送嘉禾伍公矩歸桂林兼問訊海鹽張靖之

平生故人伍公矩少年學文今學武
曾中豪氣老更豪境變情遷寧少沮
酒酣耳熱歌烏烏手執如意擊玉壺
興來拔劍為我舞電光燿歛雲披敷
仰天大噓向人語顧儂豈是噲等伍
筆端一萬丈虹霓曾次三千歲今古
憶年二十三十時風中快鶻囊中錐
廣寒紫桂白手斫滇池綠駿赤脚騎
奉天殿下丹墀底頃刻雲烟生滿紙
瑠林宴罷馬如飛一轡穿花三十里
功名富貴皆等閒

致身承明殊不難
覓得一州如斗大
又被秋風摧紫蘭
瑤簫玉筍山如畫
靜符韜鈴意閒暇
堯山祠下拜放勳
干羽兩階祈日化
絳灌之武隋陸文
今人未必下古人
長籌入手一運轉
溪山失險鬼不神
李廣數竒顏駟老
發弓束書尋舊道
英雄回首即神仙
忙處人多閒處少
青天浩蕩雲渺茫
吳山高兮粵水長
南歸若見張給事
引杯燒燭歌我送
行章我亦頭顱如
雪白每憶故人心
惻惻明當歸棹過
嘉興看劍檢書話
疇昔

為王侍郎題鯉魚圖

世間萬類水族多，魴鱮鱸鮪蛟龜鼉就中赤鯉公最貴。
三十六鱗如星羅，陽鱗九九陰六六。雖稟魚形有龍骨，
禹門寧肯點額歸。鯨海終須揚鬣出，誰哉貌此化龍姿。
丁紋錦片光陸離，淵潛一躍勢直上。波濤起立雲下垂，
太平時世無頰尾悠悠洋洋安所止。江湖處處皆恩波，
於物常如靈沼裏。

靈壽杖壽徐庶子乃尊

我聞仙山有竒木似木還非又如竹豢就天池走陸龍
削成玄圃輝山玉天生尺度齊人長清如水雪堅如鋼
偶然爪甲相擊觸鏗金戛玉函宮商赤城九節殊怪詭
蜀江桃竹未為美不知漢家何處得此枝骨格不凡足
文理經年閱代何靈竒在處神物常護持上端或炳太
乙火節間容刻丹書辭天子用優老老臣恃扶危夸父
寧忍棄長房不敢騎變化去來那可測既失千年今再
得當時北闕賜師臣今日南州壽仙客南州仙客高士

孫白頭釣隱荆溪濱至今傳與養生訣步履如飛不動
塵聞道今年年七十拄杖趨朝此其日玉堂令子隔稱
觴望拜南雲寄詩什緘題寄遠祝長生共願年高身轉
輕曉起撥雲穿竹逕夜深桃月扣松扃歲歲年年持此
杖長伴神仙地上行

梅窓琴樂

高人好琴得天趣開窓靜對梅花樹江空歲晚夜深時
丁丁似共南枝語淡香疎影太古音箇中樂趣清且深

等閒三弄梅花曲花不在梅花在琴

題竹送湖廣湯僉憲

古來脩竹何處多鄴杜之間淇水阿填河落澗竹官廢
但見土岸流渾波北風寂歷南風起千里飛青渡江水
瀟湘兩岸遙相連班班盡染虞妃淚鶉鴉鳴時草不芳
杜衡揭車總荒涼獨有此君不改色挺挺植立如人長
顏雲壓頭底復舉細雨斜風任梳洗渭川豈但千戶侯
孤竹詎云止二子君今持節騷人鄉眼中所見皆鸞凰

清風明月有真境寫境何必勞
玄香平生愛竹應成癖
此日移栽近霜栢滿堂秋色寒
蕭蕭一笑出門楚天碧

題竹石圖送陳宗堯

竹君平生何所尚寶晉齋前米家丈
昂昂高節抗浮雲
托根仍在雲根上誰言金石交
堅剛相遇難久調誰言
梅竹友時去繁華竟何有此君
落落非凡夫此文豈是
柔佞徒相依自古貴得所
世間朋類疇能如吳興沈郎
有深意發洩胸中剛大氣
筆頭凌厲帶風霜眼底空明

賤松桂君今得此從誰何此意知者良不多與君結誼
亦如此興來感激為君歌我為君歌君勿怪一笑相看
兩無碍君應吟嘯携我遊我當抱笏為君拜

商山四皓圖

商山有路通秦畿溫谷瓜禍獨見遺四翁無乃亦多智
不但博浪沙中椎惜哉逢時苦不早龍顏一見驚純皓豈
不聞太公八十遇文王壯心豈逐年華老

睢陽五老圖

炎光焰焰中天明歸德節鉞從此升高年耆德致官政
同來此地娛餘生五人四百三十九鶴髮酡顏並眉壽
座中越客真達尊不似相如居客右

題松

蒼龍挈雲欲上天鱗甲飛動頭嶄然碧風吹海翠濤湧
笙簫一派空中懸深山大壑無人到琥珀埋光兔絲槁
家家東葦作屋楹未必長材此中老

題月桂圖為呂希仁儀曹作

金華集卷二
我昔神遊廣寒宮瓊樓玉宇高重重吳剛停斧望舒笑
邀我醉飲香雲中素娥起舞仙風煖翠袖離襪珠歷亂
金蟾背上影長寒玉兔口中香不斷酒酣滿袖携古香
回看倒影塵茫茫世人有眼竟莫識誰紅誰白空講張
十年不作遊仙夢萬事悠悠總醯甕窳錦窩前看寫真
妙趣惟應故人共相看一笑情自和步雲舊約今如何
此時剩有閒田地想是清光應更多

十龍漱潤壽泰和封學士尹公

澄江江上逢原村村後仙巖高入雲蜿蜒神物久變化
鄉人傳說名空存巖中空洞無塵土石壁流泉注如雨
一泓碧玉清照人寒藻遊魚澹容與白石爛爛泉涓涓
泉不涸兮石常堅誰其肖之吉甫裔德潤九族壽千年
屈指明年七十歲久矣恩封因子貴侍講經幃未得歸
即景分題寓深意十龍之景我所分祝公清潤還嶙峋
崢嶸頭角長滿眼子如諸葛孫如荀

壽四明隱者

彩雲輪困紺宇清南極一星天外明先期太史奏壽徵
四明洞天甬東城長眉廣顙撲而雅鄉里咸稱有道者
皇揆初度八月初人人賦詩祝純嘏

題童志昂都憲諭蜀圖送其再使蜀

蠶叢之國妖氛生羽書雜遝來天庭九重天子赫然怒
咨誰可仗西南征虎頭將軍攘臂起怒髮衝冠爭裂眦
長鎗大劔置不問竭來獨運毛錐子毛錐子藏鋒鉉貯
雲含霧飛電光錮刀百鍊非不利蛇矛八百空自長螭

均當日曾簪白纓血流丹今變赤捫參歷井掃橈槍坐
使岷峨迴秀色却笑漢家功業卑臨邛犬子騰虛辭唐
蒙已通楚中道叟叟筆舌將奚為何如此日功尤偉赤
子弄兵潢池裏輕裘緩帶笑指揮曳帛書功報天子平
地誰知有伏機中山篋書終致疑張嬰就擒滕撫黜古
來往事多如斯外境息來專內養徃古來今門俯仰邊
機事動問陳湯枹鼓聲聞起張敞劍閣峩峩棧道連高
樓百尺仍籌邊君不見積功滿千簡上玄英雄回首即

神仙

送進士蔣昇得告還鄉

平生故人河西宰官轍所至多遺愛用才不盡慶有餘
天意分明猶有在二子食報非偶然一日聲名播中外
大者如麒麟頭角定趾無非仁小者如鳳凰胸臆羽翮
咸成章奉天殿前試制策文彩翩翩聲赫赫人家得一
已為多同氣聯芳更竒特仲也讀書筵中秘飲食坐卧
皆文字伯兮賜告歸故鄉周旋舉動皆恩光人生生子

有如此地下有靈應亦喜昇兮昇兮今汝歸歸拜先塋
為致辭後死故人無恙在鍾情還似有生時

赤壁圖

烏林赤壁江東注千載曹劉爭戰處黃州遷客雪堂成
水落山高天薄暮扁舟一葉泝流光洞簫吹月鶴橫江
自從兩賊留傳後世人不復談周郎

剡溪圖

滿天風雪江漫漫我所思兮在江干興來拿舟欲相訪

中途興盡俄然還古來友誼敦信行情好在心寧論興
月梁夢覺動遐思夙駕遙遙千里命


笠澤圖

我聞在昔天隨翁浮家浪迹笠澤中筆牀茶竈隨所寓
潤物搜腸情興濃七澤三江通甫里一葉扁舟五湖水
年來遯世避風波不知長在風波裏

彭澤圖

幾年作縣山城裏只緣五斗官倉米終朝汨沒簿書間

矮屋擡頭頭不起
可堪時事日已非
賦歸豈為鄉里兒
候門童子望我久
奮飛不得嫌舟遲



重編瓊臺彙卷二